

四庫全書

子部

欽定四庫全書

子部
說郛卷七十六

詳校官庶吉士臣陳若霖

員外郎臣牛稔文覆勘

總校官編修臣倉聖脉

校對官中書臣張 瑱

謄錄監生臣王會燕

欽定四庫全書

說郭卷七十六

元 陶宗儀 撰

錦帶書

蕭統

大簇正月

伏以北斗周天送玄冥之故節東風拂地啟青陽之芳
辰梅花舒兩歲之粧栢葉泛三光之酒飄飄餘雪入簫
管以成歌皎潔輕水對蟾光而寫鏡敬想足下神遊書
帳性縱琴堂談叢發流水之源筆陣引崩雲之勢昔時

文會長思風月之交今日言離永歎參辰之隔但某執
鞭賤品耕鑿庸流沉形南畝之間滯迹東臯之上長懷
盛德聊吐愚衷謹憑黃耳之傳佇望白雲之信

夾鍾二月

伏以節應佳辰時登令月和風拂迥淑氣浮空走野馬
於桃源飛少女於李徑花明麗月光浮竇氏之機鳥美
芳園韻響王喬之管敬想足下優游泉石放曠煙霞尋
五柳之先生琴尊雅興謁孤松之君子鸞鳳騰翩成萬

世之良規實百年之令範但某蒹戶幽人蓬門下客三
冬勤學慕方朔之雄才萬卷長披習鄭玄之逸氣既而
風塵頓隔仁智並乖非無衰侶之憂誠有離羣之恨謹
伸數字用寫寸誠

姑洗三月

伏以景逼徂春時臨變節啼鶯出谷爭傳求友之音翔
藥飛林競散佳人之鱗魚遊碧沼疑呈遠道之書燕語
雕梁狀對幽閨之語鶴帶雲而成蓋遥籠大夫之松虹

跨澗以成橋遠現美人之影對茲節物寧不依然敬想
足下聲馳海內名播雲間持郭璞之毫鸞詞場月白吞
羅含之彩鳳辯圓日新某山北逸人牆東隱士龍門退
水望冠冕以何年鷓路顏風想替纓於幾載既違語嘿
且阻江湖聊寄八行之書代申千里之契

中呂四月

節屆朱明晷鍾丹陸依依聳蓋俱臨帝女之桑鬱鬱
城並挂陶潛之柳梅風拂戶牖之內麥氣擁宮闕之前

敬想足下聲聞九臯詩成七步涵蚌胎於學海卓爾超
羣蘊抵鵲於文山儼然孤秀但某窮途異縣歧路他鄉
非無阮籍之悲誠有楊朱之泣每遇秋風振響鶉鷺子
夏之夜夜月流輝鵲繞將軍之樹既乖連壁之契終隔
斷金之情中心藏之卑誠至矣今因去鴈聊寄葛藟如
遇回鱗希垂金玉

蕤賓五月

麥隴移秋桑津漸暮蓮花泛水艷如越女之腮蘋葉漂

風影亂秦臺之鏡炎風以之扇戶暑氣於是盈樓凍雨
洗梅樹之中火雲燒桂林之上敬想足下追涼竹徑托
蔭松間彈伯牙之素琴酌嵇康之綠酒縱橫流水酌酊
顏山實君子之佳游乃王孫之雅事某沉疴漳浦卧病
泉山頓懷劉幹之勞鎮抱相如之酷是知枯榮莫測生
死難量驗風燭之不停如水泡之易滅聊伸幣札以代
勞人佇覩芳詞希垂愈疾

林鍾六月

三伏漸終九夏將謝螢飛腐草光浮帳裏之書蟬噪繁
柯影入機中之鬢濯枝遷而潦溢芳槿茂而發榮山土
焦而流金海水沸而漂爍敬想足下藏形月府遁跡冰
床披莊子之七篇逍遙物外玩老聃之兩卷恍惚懷中
但某白社狂人青緗末學不從州縣之職聊立松鶴之
間時假德以為隣或借書而取友三千年之獨鶴暫逐
鷄羣九萬里之孤鵬權潛燕侶既非得意正可忘言諸
不具伸應俟面會

夷則七月

素商驚辰白藏屆節金風曉振偏傷征客之心玉露夜
凝直泣僊人之掌桂吐花於小山之上梨翻葉於大谷
之中故知節物變衰草木搖落敬想足下時稱獨步世
號無雙萬頃澄波黃叔度之器量千尋聳幹嵇中散之
楷模但某一介庸才二隅頑學懷經問道不遇披雲負
笈尋師罕逢見日俛仰歎形影自憐不知龍前不知
龍後鶯鵬雖異風月是同幸矣擇交希垂影拂

南呂八月

一歎分飛三秋限隔遐思盛德將何以伸白雲斷而音
信稀青山暝而江湖遠敬想足下羽儀勝睠領袖嘉賓
傾玉醅於風前美瓊駒於月下但某登山失路涉海迷
津聞猿嘯而寸寸斷腸聽鳥聲而雙雙下淚當以黃花
咲冷白羽悲秋既傳蘇子之書更泛陶公之酌聊因三
鳥畧叙二難面會取書不能盡述或叨鳳念不黜魚緘

無射九月

宿昔親朋平生益友不謂窮通有分雲雨將乖既深伐
木之聲更問采葵之詠屬以重陽變叙節景窮秋霜抱
樹而擁柯風拂林而下葉金堤翠柳帶星采而均調紫
塞蒼鴻追風光而結陣敬想足下秀標東箭價重南金
才過吞鳥之聲德邁懷鮫之智但某衡門賤士甕牖微
生既無白馬之談且乏碧鷄之辯歎分飛之有處嗟會
面以無期聊伸布服之言用述併糧之志

應鍾十月

節屆玄靈鍾應陰律愁雲拂岫帶枯葉以飄空翔氣浮
川映危樓而疊迥胡風起截耳之凍趙日興曝背之思
敬想足下山嶽鍾神星辰挺秀潛明晦跡隱於朝市之
間縱法化人不混鄉閭之下某陋巷孤遊穿牆自活終
朝息爨若孔子之為貧竟日停炊如范生之在職牛衣
當被畏見王章犢鼻親操恐逢犬子雖此慚賤而不羞
貧綺服有時此言何述

黃鍾十一月

日徃月來灰移火變暫乖語默頓隔秦吳既傳蘇李之
書更共范張之志冷風盛而結鼻寒氣切而凝脣虹入
漢而藏形鶴臨橋而送語彤雲垂四面之葉玉雪開六
出之花敬想足下世號冰壺時稱武庫命長袂而留客
施大被以招賢酌醇酒而據切骨之寒溫獸炭而祛透
心之冷某携戈日久荷戟年深揮白刃而萬定死生引
虹旗而干決成敗退龍劔而却步月下開營進鯨鼓而
橫行雲前起陣徒勞斬斫豈用功勳諸不具陳謹伸微

意

大呂十二月

分手未遙翹心且積引領企踵朝夕不忘眷友思仁行
坐未捨既屬巖風極冷苦霧添寒冰堅漢地之池雪積
袁安之宅敬想足下棲神鶴駕眷想龍門披玩之間願
無捐德某種瓜賤士賣餅貧生入鑿竈以揚聲不逢蔡
子駕鹽車而顯跡罕遇孫陽徒懷叩角之心終想暴腮
之患既為久要聊吐短章紙盡墨窮何能懇露

耕祿橐

胡錡

擬力田詔

詔曰民以食為天食不可缺則民不可惰堯敬授禹粒
又盤庚曰力穡乃有秋此古者毆民之農使著本而食
其力我國家躬籍以供祀典制地以行仁政詔寬減賦
租勉率亦云至矣比年以來嘆愁轉徙壯者不緣南畝
而無常心豈斧斤奪其時歟繇役分其力歟厚斂以困
之歟朕知無逸艱難亦惟責躬懼德弗類方春時和土

膏脉起民事不可緩爾郡國循行阡陌宜究民恫以勸
農為急若有蠹賊痒而稼者鋤之爾父老率子弟孝悌
陳敷苗覃播載于胥斯田既順既宜則自今以始歲其
有秋民無阻饑乃朕之意

擬銀青光祿大夫提舉醴泉觀田萬頃特授保康
軍節度使兩淮安撫制置大使兼判揚州兼提領
措置屯田大使節制本路河南出戍軍馬加食邑
實封制

建列轟以分封載嚴維翰奄全淮而作牧兼重留七疇
茲銀信之庸幡爾琳庭之處控師干而衛社隆使指以
旌奮允熟輿言誕敷大號銀青光祿大夫提舉醴泉觀
田萬頃菑而肯播公以忘私退睦鄉閭有同井相友之
義進陪卿伯為立極經野之謀其至忱則忠乎君其實
意則近乎古頃以仁政之潤澤推為太平之紀綱貢助
徹皆便于民不奢不儉租庸調悉寬其法欲逸欲安持
界限以素嚴立經制而益謹無甚富甚貧之弊見謂均

平縱近臣近親之家莫敢踰越方坐致幽原之化乃祈
歸堯壤之耕亟示勉留爰加優渥品特升於華戟廩爰
賦於真宮少酌在畝之懷終冀惠疇之用矧維揚之重
鎮實今日之要區未雨綢繆合謹本根之備及時閒暇
當為兵食之圖顧惟禮耕義種之賢足副內修外攘之
志統綏疆場申畫郊圻省騎墾湟宜舉充國破羌之策
分兵闢渭必循孔明定蜀之規以耒耜執戈爰以襁褓
行介冑象耘沃野戰守有經蟻聚列營坐作聽命期復

恢於境宇宜渙錫於山川是用陟防渚之齋旄開廣陵
之榮鉞兵事節度悉歸封履之中地利便宜盡入輿圖
之內仍申采錫庸顯恩崇於戲師整戎修徹土冀歌於
周雅馬騰士飽平淮宜上於唐勛往服朕言式永終譽
可特授保康軍節度使兩淮安撫制置大使兼判揚州
兼提領措置屯田大使節制本路河南出戍軍馬加食
邑實封

代田萬頃到任謝表

琳館養恬莫息丘園之駕琇戈疏寵誤分淮甸之弓額
天控避以弗俞跼地勉承而有覲伏念臣量慚淺薄品
特下中少事耦耕粗得帶經之樂壯沾圭祿頗懷憂國
之忠越內外以若疇辨總結而定賦千夫萬夫之長愧
匪其材九推五推之間備殫其力乃上從盤之請欲陶
擊壤之情忽授鉞以總師俾建麾而顛閭矧長淮之境
土為吾國之藩籬民賴懷生軍資討實秉戈執耒宜為
足兵足食之思牧馬飯牛盍講且戰且耕之政鞠旅而

苗其芑出車而忝其華戊午式遣則無載飢之憂徒御
式嚴則有峙糧之望預為雨徹之計可收日辟之功六
月出征敢廢歌豳于七月夏官董正尤當任甸於地官
顧無圻畫之良規曷副蕃宣之隆寄茲蓋恭遇皇帝陛
下恢復疆宇整齊乾坤一成立中興之基大披圖籍九
井張太平之紀丕混車書內將拓梁山奕奕之區外欲
歸齊國章章之土知臣粗能積穀故使備邊察臣稍熟
分耕故資治塞庚癸政需於飽餉戊己宜增於鉅屯臣

敢不實壑實墉乃疆乃理三事就緒勉修漬浦之戎萬年揚休願報土田之德

擬常熟縣開國侯穀實進封常熟縣開國公加食

邑實封制

慶有年而介福久疏分井之封播攷績以陟明爰進植圭之秩乃睠奏艱之惠載推報本之恩允稊師言誕揚渙號常熟縣開國侯穀實學深種植仁熟滋培一日無食則飢司民之命三代處農而教為道之原其和足召

陰陽之和其貴能賤金玉之貴豳歌始播婦媿敵以勤
勞魯頌于征牧在垆而蕃碩行師則藉之輓粟徹疆則
資之峙糧持常平使者之權視時登損佐地官司徒之
職待國調頒疇庸既詠於屢書班祿宜先於增賦乃刻
名於鏤壁乃彰用於筭彛爰即侯疆就陞公爵予以重
宅生之寄予以顯育教之庸於戲歲月日時無易而用
明朕已建九疇之範水火木金惟修而永賴爾其叙萬
世之功益厲後圖嗣有華寵可進封常熟縣開國公加

食邑實封

代穀實謝表

八政之疇曰食粗喜屢豐九井之田為公誤叨進秩增
畚錫寵擊壤知恩伏念臣函直無竒簸揚有覲勿正勿
忘勿助幸免掘苗實裒實發實堅僅能維拒顧何修而
何飾蒙載柞以載芟天子元日而祈于郊至勤聖駕冢
宰杪歲而制其用亦費廟謨偶六穗之告登而三農之
胥慶遽超榮於品祿仍加衍於戶租不稼而困祗負素

餐之愧奏艱而粒實歸教藝之仁茲蓋恭遇皇帝陛下
心應形聲化調風雨正德惟和惟叙舜厚其生休徵用
乂用成禹敷其福異畝遂生於同穎靡田不挺於稠華
雖已誇狼戾之秋或慮有鵠形之歲獎職方而任貢升
廩氏以司儲猥令燕黍之微亦被周禾之命臣敢不茂
加播殖益務滋生八月獲十月場力課服田之事九年
耕三年食誓殫憂國之忠

擬隴西郡開國侯來牟進封關內侯加食邑實封

制

登實祈春已課兩岐之最薦名告夏爰疏易地之封於
皇孔碩之英貽我秦膚之美穀差吉旦穡播猷言隴西
郡開國侯來牟外叶坤黃內涵賁白載行于野懷大夫
君子之忠斯饗我農成先公風化之業將其來食迄用
康年滹沱對竈之時竟能濟業崆峒跨鞍之頃遂底休
師庸進績於農書復侑忱於寢廟來咨來茹有在公助
祭之恭實好實堅相尊祖配天之道爰易隴西之舊壤

聿陞關內之新畬於戲雨露肥磽之不齊爾既勉修於
人事山川土田之大啟朕其加錫於侯功往服休恩勉
圖後效可進封關內侯加食邑實封

代來牟謝表

代食維好績愧乏於善收往即乃封恩誤叨於登進自
天錫命易地祇榮伏念臣桑下枯茨丘中槁茁髮鬢黃
髮老風雪之彫殘皦皦素心抱冰霜之潔白生樂國而
無鼠苗之感歷元都而有兔葵之恩因問俗於關中輒

借階於陛下爰進仲舒之策勿令後時至形武帝之憂
詔其益種欲使畝畎畛庶之所皆有春登夏實之資地
方慮於不齊意敢希於所報詎期削木之質遽躋沃壤
之區茲蓋恭遇皇帝陛下德游祥雲政如時雨五穀共
衍藹永平膏沐之懽多忝同登播元和天錫之頌課吏
奏漁陽之最談兵却新鄭之師以薦廟而勸相農民以
問價而選掄使者肆令穉植亦被播耰臣敢不小大懷
忠艱難陳業誦原野南都之盛已幸富饒歌官室故國

之墟尚祈警戒

擬米稊除祭酒誥

唐得祭酒生徒皆喜謂不寂寞矣蓋橋門冠帶之地必
資醉經鉅賢而為之長以爾學殖素醇詞英早粲粵自
脫穎而來詩曰或春或揄或簸或蹂其所踐揚亦既熟
矣頃登米廩教思薰陶士君子已有成周既醉之行今
擢表成均維其令儀以式我賓僕使酌道味德者皆沉
浸乎醴郁則將用汝作醴往惟欽哉

代米稊謝表

任問師之耕農功舉實進司成之長賓僕增華揆量逾
涯懷榮躋地伏念臣素無學殖徒有仁根后稷教藝以
來芳聯南畝陶潛賦歸而後穎露西疇在前深愧於粃
糠若作尚資於麴蘖忽從米廩叨佩水蒼清為聖人中
伴樂道涯之泳醉有君子行使沾德海之流自非沐漢
化之鴻醇何以式周朋之燕滑茲蓋恭遇皇帝陛下氣
薰嘉協瑞格和平當豐年高廩之秋畀烝為醴闡七月

公堂之教獻饗稱觥將溥陶民俗於溫溫迺首觀儒風
於渾渾肆令淺薄亦被涵濡臣敢不洗戒非彛禮嚴有
旨招諸生而浸釀郁盍明立館之規造三代而樂優游
共適舞雩之趣

擬馬叔除駕部誥

乘輿法駕公卿奉引太僕御參屬車蓋所以嚴導扈也
爾理明芻悅才有駿聲乘馬在廐推之秣之闕一之職咸
休厥功朕甚嘉之今將駕鑾車涖明堂擢爾司駕僕臣

正厥后克正思無邪思馬斯臧爾其搜舉天閑之政使
徒御不驚既碩孔安則為稱厥職其往欽哉毋失朕命

代馬菽謝表

典廐濫員無裨仰秣司輿躡寵有覲分曹聞命凌兢銜
恩激烈伏念臣用非穀粟材僅秭穡駒谷逍遙慣飽南
山之味駟原濡沃備嘗幽圃之勞荷不棄于牧芻俾進
供於飼秣約軼鳴公鑿之節宜預均調法駕備六馬之
參盍先審御騰槽有幸導扈何居茲蓋恭遇皇帝陛下

臨下以寬馭臣以爵自強不息時乘六位之飛示朴為
先日却千里之獻屬舉我享我將之禮載嚴既閑既庶
之司肆使駕疲獲依騎乘臣敢不益鞭而後載範其馳
地熟九方幸已塵於太僕天低五路願長擁於屬車

擬良耜除司農卿誥

自大易取益之利以教天下時則有若此選已居開物
成務之先矣爾梗柞風雨之姿樟楠雪霜之氣斲而成
之惠我南畝其利已溥朕所嘉賴擢儀九扈蓋以后稷

之化幽原漢文之躬籍田皆爾之力爾其為朕率趨末
之民而知本起惰安之習而力勤俾五穀皆熟有年屢
書是為毋曠厥職其往欽哉

代良耜謝表

土木起膏倣嚴斲木之教天田携角誤躋司稷之班聞
命凌兢戴恩偃僂伏念臣泥塗未脫畎畝不忘陳王業
以歌豳粗知大本利天下以取益祇效小忠我田既臧
其笠伊糾乃或耘而或耔始載柞以載芟正以九農播

厥百穀侯伯侯亞侯彊侯旅有厥其庶如茨如梁如坻
如京終善且有猥慚芻賤濫辱稼卿茲蓋恭遇皇帝陞
下授厯析因分田友助即功以知稼穡靡或違寧親耕
以給染盛昭然示勸爰重中和書之進載祈秋冬報之
豐肆使畬耰亦躋扈棘臣敢不戒其趨末毋或違時擊
壤而歌敢云帝力之何有叙疇以久當思農政之用成

擬水部車龍除水陸轉運使誥

作周川衡已成歲績為唐發運爰重使名自非負洞達

之奇何以稱轉輸之選以爾風猷淵湛器識陂涵輪囷
而容之蟠素無滯碍犖确而骨之蛻獨任捲舒見謂圓
機九流通之材故有一動萬波隨之譽已咨決汎更賴
沃焦旱魃滌滌蘊隆蟲蟲孰慰兢兢之念小子蹻蹻老
夫濯濯共歌板板之詩迺不憚於勤勞爰妙加於廻斡
朕深嘉汝最宜究其能俾司將漕之權毋效談河之濶
決鴻歌飯已興陂下之耕流馬運糧期進漢中之策勉
加濡沃嗣有激昂

代車龍到任謝表

職濫水衡何補禹疇之用光濡濕轡誤叨漢漕之榮沐
浴恩波滂沱感涕伏念臣材卑碌碌量淺沾沾刊木而
龍其驅粗竭放菹之力防稻而緒其畜僅殫掌澮之勞
政慚俛仰以隨人所冀卷藏而東閣川適逢於滌滌泉
曷導於源源乃沾詔墨之鴉鬣俾濯篆文之龜拆流濕
就燥泄北海以灌涯自下升高激西江而救涸爰煦斗
升之活以將輦駕之輸茲蓋恭遇皇帝陛下德厚海涵

道明川理見善莫禦其決化妙流通從諫如轉諸圜迹
無碍滯肆令猥瑣亦玷選掄臣敢不胝足施功鞠躬盡
瘁鑿渠引渭當溥霑涇下之田輓粟飛芻願長富闕中
之廩

擬趙鑄除金部誥

工欲善其事必先利其器為農亦然爾仁為之力義淬
其鋒早入爐錘取鍛取礪迄用有成原田每每拮据將
荼農亦良苦非藉爾何以芟夷哉此詩人所以有良耜

臣工之褒朕嘉汝績擢司禹金今而後聚百鍊之精以
鑄農器俾啟辟攘剔之有其具以成我黍稷往若予工
毋廢厥職

代趙鑄謝表

掌周野之器請事老農修禹府之金誤登劇部自天聞
命無地措躬伏念臣生本親鋤質為至鈍畝田春暮其
殫序艾之勞南畝秋函爰竭薈茶之力方慚治躍忽拜
秩增六齊輶人之工乃令典領三品揚州之貢亦俾甄

收豈伊鑛頑足堪器使茲蓋恭遇皇帝陛下政堅所執
義成者方治天下猶在鑪範于堯鑄求良弼用作礪起
自傳巖畫化買刀悉歸銷戟臣敢不切磋磨琢芟夷蘊
宗斷矣同心輔大易耒耜之教作而從革成洪範稼穡
之功

擬犁春知健為郡兼勸農使誥

古有農官我朝分牧者繫農使示厚本也爾剛木近仁
遜肥空谷神光牛背訛寢莫羈左廻右抽徃來修直高

原卑隰堅粟方苞亦既著勞効矣健為名郡也畀爾一
麾爾其求距心之芻化渤海之犢俾千里無曠土亦克
用勸則予汝嘉

代犁春到任謝表

雨足周原方協夢魚之兆地分蜀壤將還佩犢之風延
見老農具宣聖澤伏念臣梓人傳之矩矱鐵爐步之範
模枝雖厄於塗泥性獨耽於畎畝駢其勿用惇爾來思
給荊州之民無禪強本供柳中之士何補增屯誤簡三

推之知猥被一麾之寵載循漢陌共理嘉陵率彼戍兵
市纈繒而田沃助其鄰里勞酒食以疇良勉收破塊之
功實藉起膏之賜力殫殫報祝汗邪茲蓋恭遇皇帝
陛下輝蓄牯亨明離牝吉引重致遠教耒耨以變通綴
紆服總接車麟而沛艾迺擇人而作牧伴領使以勸耕
臣敢不芻豆銜恩蒲鞭示化種四萬頭之益願廣租分
耦五百兩之連尤思糧衛

擬侯亞除籍田令誥

農者天下之本也朕躬耕籍田率勸百姓掌籍者必惟其材蓋是職周為甸師漢祠先農國朝俾典宗廟社稷之祀爾壯而知本穡事艱難皆熟諳之今擢爾令宜殫竭其勞亦服爾耕以相我農民匪但典祀事而已往欽哉無荒朕命

代侯亞賀皇帝籍田禮成表

帝籍親臨禮重三推之祀皇恩大賚歡陶萬宇之春國典告成臣工稱慶竊以農而安本國重勸民載耒於保

介之間教頌月令掌甸為樂盛之備職隸天官或歌祈
社稷之詩或下帥公卿之詔金根登壇朱紱下郊皆非
侈觀美之文政以表躬耕之意洋乎今日展也盛儀恭
惟皇帝陛下萬物覩乾三登樂泰仁禾善養獨明稽事
之艱德稷惟馨恪謹稼彛之奉農祥正而土膏起幽畝
饒而春日遲雷動絳轅擁百僚之穆穆風生青耜慶千
耦之耘耘爰畢農功載親祠事天地祖宗之歌格和溢
奉璋孝弟頌白之泳游恩霑賜帛金鷄飛舞寶兕忻愉

聿新曠代之逢不慰輿情之徯臣等叨隨擊壤快覩回
鑿賈誼耕籍之言已陪給祭孟軻均田之說尤冀行仁

擬木斛除度支使誥

舜齊七政量居其一盖微此不足以平天下之心也苟
非其材不在茲選爾中通而外直體圓而用方景山松
栢是斲是虔就匠之輪以成厥器乃命式於九圍既戒
既平時靡有爭朕已嘉汝績矣今擢司計度凡國賦之
出納軍儲之斂散一歲幾何悉資等畫爾其必有昔人

不差升斗之長也徃祇使事毋忽朕言

代木斛謝表

乾圜合制粗守均平渙汗有華忽陞計度循牆祇奉敎
板欽承伏念臣器本易盈筭無足算為之以信曾陳韓
愈之言剖而不爭徒抱莊周之志故在取益則圭撮不
容少失有所宜損則忝勺弗使或加職第謹於漢倉政
何裨於舜度愧蔑允工之報遽叨經費之諮矧歲計年
支貴不差于升斗而沙量籌唱期盡給于樵蘇慚無聚

米之長曷勝足食之任茲蓋恭遇皇帝陛下叅天量廣
並日德明無黨無偏成洪範農疇之用有容有執尊中
庸既廩之賢以平政而行仁每量能而授職遂令空竭
亦在簸揚臣敢不益盡虛心堅持端槩出入幾何之問
所合講明會計當矣之言尚思佩服

擬倉部高廩除提舉常平倉誥

蓄積以備水旱此堯湯用心也然司蓄積之職者必惟
其人爾彌高之望有容之德其胸中何止藏百萬矣頃

典國儲陳陳露積乃且有賑貧拯乏之心朕甚嘉之常
平使節未嘗經界今命汝往以究其材漢北邊之給唐
京師之置皆昔賢所講明者可權度而舉行之使吾民
含哺鼓腹咸遂一飽之樂則朕益汝嘉往惟欽哉

代高廩到任謝表

廩曹公職慚無一粟之裨庾節叨榮誤被六絲之遣穀
消問俗粒飽知恩伏念臣腹本空虛慮先饑困義重將
軍之急劔屢指糧禮知賢者之尊鼎加繼餽幸遂坻京

之詠僅道屢困之譏方祈學稼以歸耕忽俾集芑而度
度豐凶品約當思戴胄之規貴賤權宜盍究壽昌之策
第虞罄乏曷副寵綏茲蓋恭遇皇帝陛下平政行仁博
施濟衆先時備具成湯捐瘠之思以已視人大禹溺飢
之念故當饋動人才之歎而盱食有民瘼之憂豈伊罌
儲亦塵器使臣敢不棠知所發飯不敢忘馳隰而廣諮
詢具宣德意視歲而為斂散加惠黎元

水族加恩簿

毛勝

水族浙地之產為多加恩簿者吳越功德判官毛勝所作也須鱗殼甲種類差殊薦醴登盤皆可於口陳言爛說不足盡其妙故各揚乃德各叙所材然後總材德形容之美假以封之令者蓋滄海龍君之命夫龍擅于海君制萬族號令其間寧有不可勝生居水國饜享羣鮮常以天饒居士自名則觀此簿者當不責而笑也

玉桂仙君

江殊乃江瑤之名

令咨爾獨步王江殊鼎膺仙姿瓊瑤紺體天賦巨美時
稱絕佳宜以流碧郡為靈淵國追號玉桂仙君稱海珍
元年

章丘大都督

一滄浪頭蓋章舉
三淡然子蓋蚶菜

二白中隱蓋車螯
四季避蓋蝦魁

令章丘大都督忠美侯滄浪頭隱浪色奇入甌稱最杜
口中郎將白中隱負乃厚德韜其雅姿殊形中尉兼靈
甘尹淡然子體雖詭異用實芳鮮玉德公季遐純潔內

含真妙外濟滄浪頭可靈淵國上相無比白中隱可含珍大
元帥豐甘上柱國兼脆尹淡然子可天味大將軍遠勝
王季遐可清綃內相頡羹郡王

真國公

一南寵乃蠟

二甲藏用乃蝓蚌

三解蘊中乃蟹

四解微子乃彭越

今多黃尉權行尺一令南寵截然居海天付巨材宜授
黃城監遠珍侯復以爾專盤處士甲藏用素稱蠟副衆
許蟹師宜授真國公圓珍巨美功臣復以爾甘黃州甲
仗大使咸宜作解蘊中足材腴妙螯德充盈宜授糟丘

常侍兼美復以爾解微子形質肖祖風味專門咀嚼謾
陳當寘下列宜授爾郎黃少相

甘鬆左右丞

仲扁乃
蛤蚧

令合州刺史仲局重負雙宅閉藏不發既命之為含津
令陞之為懋誠君矣粉身功大償之實難宜授紫暉將
軍甘鬆左右丞監試甘圓內史

清腴館學士

文名靈
蛻先生

令靈蛻先生外無排脇之敏內無鯁喉之亂宜授紅鍔

祭酒清腴館學士

橙齋錄事

鱸名紅文
生盧清臣

令惟爾清臣銷醞引興鮮鬣之鄉宜授橙齋錄事守招
賢使者

珍曹必用郎中

鱸名
時充

令珍曹必用郎中時充鑑材本美妙位無高宜授諸衙
効死軍使持節雅州諸軍事

骨鯁卿

鱸名白
圭夫子

令惟爾白圭夫子貌則清臞材極美俊宜授骨鯁卿

醉舌公

龜名
甘鼎

令甘鼎究詳爾調鼎之材噉舌潮津宜封醉舌公

擐甲尚書

鼈名甲
折翁

令甲折翁挾彈於中巧也負擔於外禮也介冑自防不
間寒暑智也步武懦緩不踰規繩仁也故前以擐甲尚
書榮其跡顯其能宜授金丸丞相九肋君

典醫大夫

鬣名長
尾先生

令長尾先生惟吳越人以謂用先生治醬華夏無敵宜授典醬大夫仙衣使者

新美舍人

石首名
元鎮

令元鎮區區枕石子孫德甚富焉宜授新美舍人

懷寄令史

石決名
朱子房

令和羹長朱子房酒方沉酣臭薰一座挑筋少進神明
頃還至於七孔賦形治目為最宜授懷寄令史

甘盤校尉

烏賊名
甘盤

令甘盤校尉吐墨自衛白事有聲宜授嘆墨將軍

通幽博士

龜名元介神

令元介卿爾卜灼之効吉凶了然所主大矣宜授通幽

博士

同體合用功臣

借眼公乃水母

令惟爾借眼公受體不全兩相藉賴宜授同體合用功

臣左右衛駕海將軍

點化使者

李藏珍即真珠班希即玳瑁

令李藏珍照乘走盤厥價不貲班希裁簪製器不在金
銀珠玉之下藏珍宜授圓輝隱士班希宜授點化使者

梵響參軍

牡礪曰房叔化
螺曰阮用光

梵響曰屈突通
珂曰羅幼文

令房叔化粉廁湯丸裹護丹器屈突通振聲遠聞可知
佛樂阮用光運體施功物皆滑瑩羅幼文類乎貝孫點
綴鞍勒粲然可觀小有文采叔化可豪山太守樂藏監
固濟突通可曲沃郎梵響參軍攝玉塔金舍用光可檢
校大輝光宜充掌書記幼文可馬衣丞

濟饒都護

田青是螺螄
江伯夷是鮪鱈

申潔是蛙
屯江小尉是江犵

令惟爾田青微藏淺味無所取材世或烹調以為怪品
申潔蒼皮癭疹矮股跳梁江伯夷宋帝酷好鰠則別名
屯江小尉漁工得雋亦號甘肥田青授具體郎申潔宜
授濟饒都護行水樂今伯夷宜授宋珍都尉南海詹事
屯江小尉宜授追風使湯波太守

銀絲省饜德郎

錦袍氏鰓也李本鯉也鮮于羹鯽也楚
鮮白魚也縮項仙人鰻也食寵侯鯿鯉

也單長福鱒也管統蔥管也備
員居士東崇也唐少連崇連也

令以爾錦袍氏骨踈肉緊體具文章宜授蘇腸御史仙
盤遊奕使以爾李本三十六鱗大烹允尚宜授跨仙君
子世美公以爾鮮于羹斫鱸精妙見稱杜陵宜授輕薄
使銀絲省饜德郎以爾楚鮮隱釜沉糟價傾淮甸宜授
傾淮別駕以爾縮項仙人鬼腹星鱗道亨襄漢宜授槎
頭刺史以爾食寵侯友節班駁標致高爽宜授添府大
監以爾單長福曲直靡常鮮載具美宜授泥蟠掾以爾
管統省象菜伯可備煎和宜授長白侯同盤司箸局平

章事以爾備員居士腥粗無狀見取俗人宜授鍊身公
子以爾唐少連池塘下格代匱充庖宜授保福軍節度
使

春榮小供奉

河狝名
黃薦可

令黃薦可爾澤嫩可愛然失於經治敗傷厥毒故世以
醇疵隱士為爾之日特授三德尉兼春榮小供奉

輔庖生

鯁名新
餐氏

令新餐氏爾療飢無術清醉有材莽新妖亂臨盤肆餐

物以人污百代寧洗爾之得氏累有由矣宜特補輔庖
生

表堅郎

令蓋頑生乎泥沙薄有可采宜授表堅郎

--	--	--	--	--	--	--	--	--

禪本草 慧日禪師

禪味甘性涼安心臟祛邪氣闢壅滯通血脉清神益志
駐顏色除熱惱如縛發解其功若神令人長壽

講味甘微辛性溫陰中陽也開心胸明目除積久翳障
益智不假修煉炮製但有精粗大小真贗之異須細揀
擇類破故紙者有毒不堪入藥此味遠出流沙外漢時
始入中國中國種之枝葉亦繁不似出西域者良宜量
元氣盛衰服之元氣盛者服之即消衰者多滯高上舌

乾口燥咽喉少津液常時痞悶令人動氣發嗔甚者發
狂尤令人脚軟不能動履中此毒者用金剛子棘栗毬
或吐或下盡吐下出宿物胸脾清虛得汗而愈一方用
大棒擊患人頭取汗亦愈無汗者不治

戒味辛微苦回甘陳久者辛味亦盡性涼陽中陰也須
煅煉炮製極淨真汗濁處便常用澡浴其樹有五葉或
八葉或十葉或一百二十葉大小粗細久近不同四月
八日及臘月八日採之良不可自取須曾採者指示乃

得此味號為藥中之王能治百病不論元氣盛衰皆宜服之元氣盛者恃強不服能致狂疾衰者初服覺苦辣頻頻服之久自得味其藥易破宜謹收藏護惜小破壞猶可用若大壞者不堪用也亦有小毒偏服者損目

定味甘微辛性清涼陰中陰也安神定魄除煩熱生津液產於深山者良亦有微毒量元氣盛衰服元氣盛者不拘時服俱有效衰者多服亦能損目令人心戰怔忡或四肢軟怯喜睡眠惡見人形惡聞人聲或白日見鬼

魅亦有強勉服之不為害者然此味內有暗毒須鍛鍊
毒盡乃可入藥有大小久近之異有九種似天棘者不
佳草澤醫人採之不入官藥其有一種土人呼為羅漢
果入藥取效差小若不揀擇悞服如天棘類者乍得清
涼直至八萬四千劫毒亦發作發則令人下墜不可服
也用般若湯為君服之最驗

淨土味甘平性清涼中和去穢惡令人美顏色長生似
蓮花有五色者青者為最不用煨煉炮製四方俱有生

西方者良無毒不論元氣盛衰人俱宜服之元氣盛者
久服之白日飛升衰者服之亦能輕身不死係古來大
醫王合成金丹留此靈藥普度世間但其味冲澹服者
多無恒又此藥屬信信則少服亦效不信者不效若大
限垂至百藥不救名醫袖手但將此一味至心服之從
一服至七服無不效者最忌世間腥穢等物若夾雜服
之取效亦微

義山雜纂

李商隱

必不來

醉客逃席

客作偷物去

追王侯家人

把棒呼狗

窮措大喚妓女

不相稱

窮波斯

病醫人

不解飲弟子

瘦人相撲

肥大新婦

先生不識字

屠家念經

社長乘涼輜

老翁入娼家

羞不出

新婦失禮

尼姑懷孕

相撲人面腫

富人乍貧

處子犯物議

重孝醉酒

怕人知

匿人子女

犯人愛寵

透稅

賊賊

不嫌

飢得麤食

徒行得劣馬

行久得坐次

渴飲冷漿

行急得小船

遇雨得小屋

遲滯

新婦見客

窮漢醜率

貧家嫁娶

謁致仕官

孕婦行步

不得已

忍病飲酒

大暑赴會

掩意打兒女

流汗行禮

忍痛灼艾

為妻罵愛寵

冒暑迎謁

老乞休致

窮寺院待客

相似

京官似冬瓜暗長

鴉似措大飢寒則吟

印似嬰兒常隨身

縣官似虎動則害人

尼姑似鼠入深處

燕似尼姑有伴方行

婢似猫煖處便住

不如不解

措大解音則廢業

婦人解詩則犯物議

僧解飲則犯戒

劣奴解識字則作過

子弟解燒煉則貧

士人解手藝則卑污

惡不久

夫婦爭小事

罵愛寵

大僚門客發怒

賊濫官打罵公人

姦汙僧尼罵行童

惱人

遇佳味脾家不和

終夜歡飲酒樽却空

方謁上官忽背癢

賭博方勝油盡難尋

淘井漢急屎尿

遣不去無賴窮親

失本體

不學發遣書題失子弟體

吊孝不衰失凶禮體

不收拾碗器家事口中不喃喃失老婢體

送客不出門失主人體

不關腰不持刀砧失厨子體

不點檢學生作課念書失先生體

不口打口罵失節級體

早晚不點檢門戶家私失家長體
僕子著鞋襪衣服寬長失僕子體
逃席後不傳語謝主人失賓客體
唱小喏行步遲緩失武官體

隔壁聞語

說所送物好還麼必是不佳
新娶婦却道是前緣必是醜
說太公八十遇文王必是不達

說食祿有地必是差遣不好

說隨家豐儉必是待客不成禮數

說屋子住得恰好必是小狹

呪罵祖先必是家計不成

富貴相

駿馬嘶 蠟燭淚 栗子皮 荔枝殼 落花飛

鶯燕語 讀書聲 遺下花鈿 高樓上吹笛

擣藥碾茶聲

謾人語

說風塵有情

說燒煉致富

說在官課績

說主上見知

說所入莊課

說愛寵年紀小

窮縣說官清

自說勤苦讀書

誇說器皿價例

酸寒

山縣移市

村縣喝道

村縣待賓

驛鳴村中

村漢呼鷄

村漢著新衣

牛背吹笛

乞兒驅儼

散樂打單枝鼓

不快意

鈍刀切物

破帆使風

樹陰遮景致

築牆遮山

花時無酒

暑月背風排筵

惶愧

犯人忌諱

遇見讐家

欠債不償逢主

叅謁失禮

醒後聞醉語

殺風景

花間喝道

看花淚下

苔上鋪席

斫却垂楊

花下曠視

游春重載

石筍繫馬

月下把火

妓筵說俗事

果園種菜

背山起樓

花架下養鷄鴨

不忍聞

孤館猿啼

市井穢語

旅店秋砧聲

少婦哭夫

老人哭子

落第後喜鵲

乞兒夜號

居喪聞樂聲

纔及第便卒

虛度

花時多病

好時節褊迫

閑官娶美婦

貧家節日

好家業不和

貧家好花樹

好景不吟

好廳館不作會

不可過

夏月肥漢

入舍妻惡

遭貪酷上官

惡俗同僚

大暑涉長途

對廡人久坐

舟中雨漏

茅屋下穢濕

守令好尋事

難容

僧道對風塵笑語

僕人學措大體段

卑幼傲尊長

僕妾攙言語

武人村夫學書語

意想

冬月著碧衣似寒

夏月見紅似熱

入神廟若見鬼

腹大師尼似有孕

重幙下似有人

過屠家覺羶

見水心中涼

見梅齒軟

惡模樣

作客與人相爭罵

打毬墜馬

對大僚食咽

僧尼新還俗

筵上亂叫喚

撓奪人話柄

著鞋臥人床

未語先笑

作客踏翻臺卓

對丈人文母唱豔曲

嚼殘魚肉置盤上

橫箸在羹椀上

不達時宜

下賤人前談經史

向娼婦吟詩

認他高貴為親

將主人酒食作人情

殘食還主人

將男女赴席

誇男女伎倆

獎男女嬌駭

筵上包彈品味

強學時樣妝束

食後不起妨主人

問主人魚肉價

與寡婦認親往來

喫他飲食不謙讓

借他物令自來取

入人房闖取人物看

得人恩不思報

向人花園採果

窮漢說大話

家貧學富人

作客自呼賓

暑月排筵久坐

悶損人

請貴客不來

惡客不請自來

被醉人纏住不放

物賤無錢買

出門逢債主

與讐家對坐

大暑逢惡客

美妾妒妻

癡頑

有錢不還債

知過不能改

見他言語強拗

見人文字強評騭

自不知過強怪人

把酒犯令不受罰

家貧強作富貴相

愚昧

背面說人過

好說人家密事

棄家耽酒

圖他酒食作證人

三頭二面趨奉人

說六親過惡與外人

父母在索要分析

會聚不識尊長位次

有憾於人望人怨

有惠於人望人報

時人漸顛狂

無故讐妒他人

酒後呼鬼神

孝子說歌令

重孝鬪鷄走馬

讐記恩門

長大漢放風箏

養閒漢出入

婦人出街坊罵詈

賣田了吉凶

將田宅與人作保

非禮

呼兒孫表德

母在呼舅作渭陽

對父母呼妻弟

聽妻話怪尊長

祭亡人却動樂

徑入他人房間

枉屈

好父母無好子

好兒無好婦

好女無好婿

有錢不會使

好衣不會著

好廳館不灑掃

有疋帛不裝著

好顏色不解疋配

好妾驅使重難事

惜錢有病不醫

男女長成不教

家藏書不解讀

明月夜早睡

有好花不吟詩酌酒

近好山水不遊玩

有美味慳藏臭腐

清要官自犯賊罪

有美質懶惰廢業

權在手不作好事

年少時好閒不習事

不祥

卧喫食

無事嗟歎

卧床上唱曲

露頂喫食

露頂寫字

牽父母作呪誓

捶胸罵人

薦上坐

對日月大小便散髮

未食椀中先挿匙箸

湏貧

家有懶婦

早臥晚起

養子不及父

作債追陪

倉庫不點檢

莊園不收拾

拋撒飲食

愛賭博飲酒

漫藏無用物

狼籍米穀

棄業逐樂

家事不愛惜

多蓄愛寵

好遷移不止

好結納權貴

慳不中禮

物貴爭買

物賤反不買

多作淫巧

遮蓋家人作非為事

必富

勤求儉用

見藝廣學

常點檢家事

不迷酒色

不欠債負

奴婢解耕織

夜眠早起

家養六畜

耕作不失時

及時收藏

子弟一心

主母不信佛

諸婦和諧

不嫌麤辣

財物有簿籍

積少成多

買賣不失時

物料不作踐

有智能

立性有守

密事機藏

結交有智人

臨事覺悟

酒後不多語

避他人忌諱

博古知今

不習賤劣事

不妄自逞能

尊敬有德

不親近小人

不妄信奴僕

入門問諱

入境問風俗

夜間常醒睡

有疑問人

不共愚人爭是非

教子

習祖業

立言不回

知禮義廉耻

精修六藝

談對明敏

進退威儀

忠良恭儉

孝敬慈惠

博學廣覽

交遊賢者

不事嬉遊

有守

遇事有知識

教女

習女工

議論酒食

溫良恭儉

修飾容儀

學書學算

小心軟語

閨房貞潔

不唱詞曲

聞事不傳

善事尊長

失去就

卸起帽共人言語

罵他人家奴婢

鑽壁窺人家

不敲門直入人家

席面上不慎涕唾

主人未請先上廳坐

開人家盤盒書啟

主人未揖食先舉箸

衆食未了先卸箸

探手隔坐取物

強會

見他文籍強披覽

見他鞍馬逞乘騎

見他弓矢強彈射

見他物件強評價色

見他文字強彈駁

見他人家事強處置

見他鬪打強助拳

見他評論強斷是非

無見識

不說事因先罵人

不問道理隨人做事

俗人學僧家道場

遇事不分別是非

縱兒子學樂藝

縱兒子籠養

男兒學女工

要小下便宜

不得飲酒至醉

不得獨入寡婦人家

不得黑暗獨行

不得與無賴子往還

不得戲取物不言

不得開人私書

不得借人物用經旬不還

雜纂續 王銍

奴婢相

扱卓高

添水滿

挑燈長

剪燭短

喫乾飯

疾睡著

放物當路

翻著衣裳

易圖謀

鄰舍貓兒

屬官古畫

小兒手中物

難柰何

恃寵婢

有錢惡妻

咬人馬

破活鮎魚

解隱形賊

被裏狗蚤

不得人憐

卒死虔婆

釘手劫賊

偷食猫兒

咬人犬

不孝義兒

別人醜孩兒

使性乞兒

不成器子弟

無憑據

山縣更鼓

選人年歲

廢落廟筊杯

低手圍碁

醉後許物

託魚鴈傳書

牙郎說呪

不封底鎖

買妾問來歷

越不得

驚馬脫籠

步尋下水船

斜日照人影

醉漢蹴鞠

病起人同飯

與村伶合曲

冷淡

念曲子

說雜劇

喫素冷淘

村伶打諢

齋筵聽說話

惡行戶

暑月作作

世代叔墓

行法僧子

少思算

無錢挾妓

低基趁手下

癡兒使爺錢

借物賽賭

秀才不讀書

不相稱

水手滄殺

師巫魔死

搭材匠跌死

縣尉著賊

糾儀失儀

法司犯法

彩畫溷室

孝服加銀帶

草屋安獸頭

先生懶惰

自做得

木匠帶枷

鐵匠被鎖

師姑袈裟

冶人鍋釜

服內懷孕

僧道犯戒律

好笑

對客泄氣

村妓妝束

長人著短衣

婦人墜馬

村巫降神

口吃人相罵

阻興

訪妓有客

便風無帆

玩月被雲遮

遊山遇雨

元宵大風雨

新婚忽有疾

花時多事

賞花聞鄰家哭聲

不可託人

相新婦

覓女使

往別州追妓

買馬

數散錢

可惜

慳人有錢

好女嫁醜漢

富商據名妓

歌妓被決

新鞋袴蹴鞠

綵皂鋪失火

玉器失手

書畫被鼠啣

古銅器重鑄

驢喫牡丹

重難

瘡上喫棒

冬月飲冷酒

暑月赴公筵

煉頂求福

許捨身修寺

陣上帶甲馬

暑月檢屍

大雨中送殯

隆冬騎遠馬

沒用處

漏餅罐

破鞋襪

隔年挑符

舊曆

折針

禿筆

又愛又怕

狗喫熱油

小兒看雜劇

小兒放紙砲

新婚女子

初登山遊玩

村夫看官過

駭人看弄鬼神

不識羞

下第一人入期集院

新女婿渾身著新衣

被妓不采強入門

賤物作貴賭輸誇口

不請自來攬坐

誇妻妾端正

邊官誇說兵權

酒食店留得筆帖

不濟事

將女嫁內官

飯後請喫茶

持齋日作客

無錢後斷賭

打殺人後戒酒

臨死許修善

臨渴掘井

江心補漏

斷決後赦到

船行借得鞍乘

臨老及第

酒盡伶人來

大斧傷人手摩挲

落解後試官說文好

暗歡喜

丈夫遠行歸

無子聞女使懷妊

賣棺聞人病重

舉子與試官有關節

選人得歧路

同行拾得遺棄物

不自量

老漢嫌妻醜

醜妻恨夫要娶妾

落第舉子罵主司

不解作官歎沉滯

作客嫌人家茶飯

大將妻要人呼縣君

低恭要與人下子

巧人作事拙人不伏

老子弟看少妓

惡札人愛使牋紙

富商騎雙控馬

下賤人呼人表德

愛便宜

共喫果子揀大底

不取錢官人賤買物

騎別人馬遠出

共被把自家被在上

將生鐵博針

養母狗雌猫

寄槽養馬

將鰕釣鼈

過不得

賃屋欠房錢

謁上官被蟲噉

暑月酣睡被蠅擾

狹巷騎馬逢車子

夫妻反目

上司不喜

臨渡無船

逢大官節

難理會

波斯念孔雀經

醉漢寐語

兩人拽斜說話

經紀人市語

杜撰草書

古篆碑額

啞子做手勢

短舌人罵詈

抽亂絲

大官侵占隣人田土

不識疾遲

急如廁說葛藤話

留未食人喫茶

判狀救火

告搶妻女要依日期

喚老娘逢人閒話

留走馬天使賭賽

發救兵須揀吉日

發倉賑饑待奏報

不識好惡

失火處說好看

看斬人說僧子好手

岸上看人溺水

向燈心皂荚鋪乞錢

養蠶處乞僵蠶

請舉子明年教學

借不得

問患脚人借拄杖

厨子處借刀

就雨中人借傘

問暑月行人借扇

少道理

不會禪和尚問答

村學堂講書

初學讀書人策論

田夫論朝政

無證見論訟

難忍耐

觀恭被禁不許教

患腹泄人尋廁不著

病起人忌口

小兒灼艾

脚骨上取箭頭

見人說無天理話

沒意頭

妓家誇會做活計

對屠兒說買物放生

對將官說儒雅事

對僧道說異端害正

雜纂二續蘇軾

巨耐

猾胥曲法取受

監司聞部下賊濫事

見非理論訟平人

知人去上官處損陷

自羞耻

和尚道士有家累

師姑養孩兒
說脫空漏綻

在官賊汚事發

強陪奉

莊家人與妓筵

不飲酒人伴醉漢

對上官說葛藤話

與蕃使接談

佯不會

對尊官饒碁

問新到僕妾手藝

初到官問舊事體

新僉民兵問力氣

旁不忿

村漢有錢

無才識人作好官

善人被小人凌辱

見初學人及第

俗夫有好妻

不快活

步行著窄鞋

赴尊官筵席

入試遇酷暑

暑月對生客

重囚被鎖縛

妒妻頭白相守

村裏女壻戴幞頭

小兒初入學堂

吏胥過嚴明長官

未足信

賣物人索價說呪

和尚不喫酒肉

醉漢隔宿請客

媒人誇好兒女

吏胥小心畏慎

妓別慟哭如不欲生

敵國講和

陡頓歡喜

窮措大及第

未有嗣生男

遠地得家書

有罪遇赦

富家兒乍入贅女壻

這回得自在

僧尼還俗

宮人放出

重孝服闋

囚徒釋脫

不肖子乍無尊長

寵妾獨得隨任

不圖好

癩子喫猪肉

乞兒突好人

去任官放潑要錢

死囚罵法官

劫盜妄引徒伴

怕人知

流配人逃走歸

買得賊贓物

藏匿姦細人

同居私房畜財物

賣馬有毛病

去親戚家避罪

說不得

啞子做夢

舉子就試偶踈脫

醫人自病

行姦被窘辱

賊被狗咬

作官處被家人帶累

藏違禁物被盜

賊賊被人轉取去

善相撲偶輸

處子懷孕

謾不得

曹司對曉事官員

諳熟行市買賣

妒妻不會飲酒

靈利孩兒買物

諱不得

健兒面上逃走字

賊見真賊

小官祖父名

有罪對知證人

改不得

生來劣相

性好偷竊

好說脫空

好笑話人

愛說是非

淫慾無度

謬漢好作文章

口吃人多說話

貪財人愛便宜

不肖子好賭博

還俗僧道舉止

婢作正室有舊態

偷食猫兒

得人惜

學行孩兒

善歌舞小妓

不偷食猫兒

快馬穩善

做活計女婿

會讀書兒子

良僕妾

好書畫

有行止公人

學不得

神仙

天性敏速

才識過人

有膽氣

能飲啖

臨事果斷

忘不得

父母教育

好交友

受恩處

得意文字

少年記誦書

留不得

春雪

暑月盛饌

愛逃席客

潮水

順風下水船

猴獠看果子

窮人粟帛

城門發更後

大官得替後

勸不得

服硫黃

酒病漢

愛賭錢人

醉後相罵

夫妻因婢爭鬧

悔不得

賭錢輸

中酒病

失口許人物

好景失遊賞

作過後事發

出語容易

少年廢學

見好物失買

怕不得

上陣相殺

夏月餅師

相撲漢拳踢

有罪喫棒

醜婦見舅姑

臺諫官言事


上竿

省不得

閩人讀書

諸行市語

番人說話



說郭卷七十六